



UPA 2014/176.1
29. april 2014
Juliane Henningsen

Meeqqat inuusuttullu 16-init 24-nut ukiullit annertuumik innarluutillit Kalaallit Nunaata avataani uninngagallartut ukiumut marloriarlutik Kalaallit Nunaannut tikeraarluni angalanermut pisinnaatitaaffeqassasut erseqqissaavigeqqullugu qulakkeerneqaqqullugulu Naalackersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaqaq Agathe Fontain, Inuit Ataqatigiit)

Inuit Ataqatigiit atugarissaarneq paasisarpaat inuiaqatigiinni sanngiitsortatsinnut aamma illersuisuusoq. Inuiaqatigiit nukittuut ilisarnaatigaat sanngitsoortaminnut illersuisuugamik.

Taamaattumik meeqqat, inuusuttut, utoqqaat innarluutillillu atukkamikkut pitsaasumik sullinneqarnissaat Inuit Ataqatigiinni pingaartippaput.

Meeqqat inuusuttullu innarluuteqartut, taakkulu ilaqutaat – pisussaaffeqarfigivagut pitsaanerpaamik sullisissallugit. Ulluinnarnilu sullisissisut tassaapput kommuunit. Qanittumilu innarluutillit sullinneqarnerat pillugu – peqatigiiffik “Inooqat” Naalackersuisoqarfik peqatigalugu isumasioqatigiisitsimmat peqataavugut. Paasinarsivoq innarluutillit ilaqutaasalu sullinneqarnerat sulii pitsaasumut naammaginartumulluunnit qallisimangitsoq.

Taamaattumik Agathe Fontainip siunnersuuteqarnermigut qulakkeerniagaa isumaqatigeqaarput, tassalu meeqqat inuusuttullu annertuumik innarluutillit nunatta avataaniittariaqartut, pisinnaatitaaffeqassasut ukiumut marloriarlutik angerlarlutik tikeraarnissaminnut. Nalunngilarpummi qanoq pingaaruteqartigisoq ilaqutariittut - meeqqap angajoqqaat qatanngutillu akornanni imminut malinnaavigeqatigiinneq; ilami kissaatiginartaraluarmanat allaat ukioq kaajallallugu ilaqutariit ataatsimuuinnarnissaat. Tamannali pisinnaanngimmat, suliasaraarput atugasarititaasut pitsanngorsarnissaat.

Annertuumik innarluutillit ikiorserneqartarnerat pillugu Namminersorlutik Oqartussat

Nalunaarutaanni nr. 23, 30. december 2013-imeersumi § 56 naapertorlugu meeqqat inuusuttullu 16-init 24-nut ukiullit annertuumik innarluutillit Danmarkimi uninngagallartut ukiumut marloriarluni Kalaallit Nunaannut tikeraarluni angalanermut ikiorserneqarsinnaapput.

Nalunaarut tusarniaassutigineqarmat aalajangersagaq ima nipeqartinneqarpoq:

-pineqartut ukiumut marloriarluni Kalaallit Nunaannut tikeraarluni angalanermut pisinnaatitaaffeqartut.

- Paaserusupparput nalunaarutip suliarineqarnerani suso-qarsimansoq ukiumut marloriarluni taamatut tikeraarluni angalasinnaatitaanerit ikiorserneqarnissamut periarfissiinerinnartut isigineqalersissimanerannut?

Innarluutilittatsinnut atugassarititaasut qulakkeerneqarnissaat pillugu manna siunnersuut pillugu aammalu inuit pineqartut ukiumut marloriarluni tikeraarluni angalasinnaatitaanerit qulakkeerumallugu Naalakkersuisut maleruagassani tamani aaqqiissuteqarniarnersut paaserusupparput.

Meeqqat inuusuttullu innarluutillit uninngasut imaluunniit illoqarfiup inunngorfiup avataaniittariaqartut ukiumut marloriarluni illoqarfimmut inunngorfigisamut tikeraarsinnaatitaanerannik aamma allannguinerit imaqartariaqarput. Soorlu nunatta iluani atuarniarlutik imlt. Ulloq unnuarlu paaqqinnittarfimmiinniarlutik aallartartut taakku aamma atugaat pitsanngorsarusuppavut, siunnersuummullu ilanngunneqarnissaa anguniarlugu kissaatigaarput siunnersuut ilaqutariinnermut peqqissut-simullu ataatsimiititaliami suliarineqassasoq.

Manna iluatsillugu oqaatigilara:

Inuit Ataqatigiinni innarluutillit eqqartornerini, innuttaasut meeqqat, inuusuttut utoqqaallu timikkut, tarnikkut inooqatigiinnikkullu innarluutillit pineqartarmata. Inuit Ataqatigiit pingaartipparput, nunatsinni innarluutillit inuiaqatigiinni akuutinneqarnermik misigisimatinneqarnissaat. Taamaattumik nunatsinni innarluutillit, innarluutilinnut tulluurtunik inissiatigut, ilinniartitaanikkut, suliffissaqartinneqarnikkut allatigullu sutigut tamatigut atugassaqartinneqarnissaat Inuit Ataqatigiit sulissutigissavaat. Sulimi maannamut iliutsigut naammangillat, pitsanngorsaatissanullu tamanut suleqataanissarput nalunaarutigissuarput.